

Submisaun ba
Komisaun C, Parlamentu Nasionál Timor-Leste

Husi

La'ó Hamutuk

Kona-ba

Proposta Orsamentu Jerál Estadu 2021

13 Novembru 2020

Konteúdu

Introdusaun	2
Oinsá Garante Sustentabilidade Finansa Estadu	3
Dalan Prinsipál ba Governu Timor-Leste	4
Projetu Tasi Mane – Sei benefisia Povu Timor-Leste ka lae?	5
Presiza Analiza Independente ba Kustu, Risku no Benefísiu sira ba Povu Timor-Leste	5
Fundu Petrolíferu La'ós atu Garante Tusan sira	6
Modelu Orsamentu Foun Sei Hamenus Transparénsia	6
Instituisaun Autónoma La Presiza Hetan Transferénsia Espesiál	7
Investe ba Ema Hodi Hametin Dezenvolvimentu Timor-Leste	9
Konkluzaan no Rekomendasaun	10

Introdusaun

Ba dala uluk La'ó Hamutuk agradese no apresia tebes ba iniciativa di'ak husi Parlamentu Nasionál ne'ebé realiza ona "Panorama Orsamentál" durante loron rua, hodi fó oportunidade ba ami sosiedade sivíl sira inklui La'ó Hamutuk atu bele hola parte iha soru-mutu ida ne'e. Ami mós agradese tebes tanba Komisaun C, Parlamentu Nasionál bele fó mós oportunidade atu ami hato'ó ami nia hanoin sira ba oradór hirak ne'ebé apresenta ona iha diskusaun Panorama Orsamentál ne'e.

Ami mós rekoñese katak ho tempu ne'ebé limitadu iha prosesu diskusaun kona ba Panorama Orsamentu nian, nune'e liu husi Submisaun ida ne'e ami hakarak partilla liu tan ami nia analiza no hanoin krítiku balu no mós sujestaun alternativa sira hodi ajuda distintu Deputadu/a sira iha uma fukun Parlamentu Nasionál. Maske nune'e ami sente triste tebes ba prosesu audiénsia Proposta OJE 2021 iha tinan ida ne'e nian iha Parlamentu Nasionál nia audiénsia sira ne'ebé ladún fó espasu ba organizaun sosiedade sivíl sira inklui La'ó Hamutuk atu hola parte no partilla ami nia hanoin alternativu sira relasiona ho OJE ne'ebé governu prepara.

Liu husi Submisaun ida ne'e ami hakarak fahe ami nia analiza no rekomendasaun save sira liga ho alokasaun OJE 2021 nian ba setór importante sira. Ami espekta katak hanoin alternativa ne'ebé ami fahe ho Ita-boot sira bele mós sai konsiderasaun importante iha prosesu debate Orsamentu Jerál Estadu 2021 ninian.

Dezde Marsu 2007 ba dala uluk governu Timor-Leste hahú halo levantamentu husi Fundu Petrolíferu. Fundu ida ne'e nudár fonte finansiamentu prinsipál ba Orsamentu Jerál Estadu kada tinan ne'ebé governu hetan liu husi retornu investimentu no reseita ne'e rasik. Aleinde ne'e, kada tinan Governu sempre halo levantamentu boot ba Orsamentu Estadu. Mezmu, Levantamentu ida ne'e regula ona iha Lei maibé prezisa halo esplikaun no justifikasaun kle'an ba Parlamentu Nasionál bainhira halo levantamentu boot liu kálkulu Rendimentu Sustentável Estimativa (RSE).

Hahú 2008, levantamentu ne'e sempre liu RSE, ne'ebé fó impaktu ba sustentabilidade Finansa Estadu, no karik mata dalan ida ne'e la relevante ona ba situaun no kondisaun polítika Governu Timor-Leste nian. Maske nune'e, levantamentu hirak ne'e kontinua la halo asaun ne'ebé sustentável tanba realidade hatudu katak levantamentu ne'e barak liu gastu ba rekorente Governu nian ne'ebé kada tinan aumenta inklui projetu boot sira ne'ebé seidauk iha analiza realístiku no responde ba kondisaun urjénsia ne'ebé povu sira prezisa.

Situaun hirak ne'e refleta husi relatóriu hirak ne'ebé fó sai husi Ministériu Agrikultura iha 2019, katak Timor-Leste nafatin iha valór ki'ik ba produsaun nasional, no rezultadu analiza husi ajénsia relevante sira katak ita seidauk konsege maximiza ba iha diversifikasaun ai-han hodi rezulta númeru inseguransa ai-han ho valór 36%, sofrentu malnutrisaun liu-liu ba labarik menus tinan 5 no situaun pobreza multi-dimensional ho 46%.


Ami apresia ba Governu ne'ebé hahú ona iniciativa no programa prioridade sira hodi halo investimentu iha ekonomia produtivu, ezemplu Governu nia planu no medida sira balu iha Planu Rekuperasaun Ekonómiku nian, ezemplu programa Cesta Báziku, no

polítika investimentu ba setór agrikultura liu husi investe ba iha kooperativa, indústria transformadóra no setór importante seluk nudár baze atu eleva ekonomia rai laran.

Nune'e, ami enkoraja nafatin membru Parlamentu Nasionál sira, atu uza nia kompeténsia ho di'ak hodi halo analiza no diskute kle'an ho Governu kona ba sira nia prioridade sira hodi tau atensaun aas no tau matan ba prioridade bázika kondisaun moris no ekonomia povu kí'ik Timor-Leste hodi nune'e garante sustentabilidade moris di'ak ba povu no mós jersaun aban bain rua.

Oinsá Garante Sustentabilidade Finansa Estadu

Governu Timor-Leste daudaun ne'e, hasoru hela situasaun krítiku kona ba continuidade ba rezerva husi riku soin mina no gas, ne'ebé tuir projeksaun sei remata iha tempu besik.



Gráfiuku iha leten hatudu kona ba balansu entre reseita no despeza estadu kada tinan inklui transferénsia no projeksaun sira kona ba rezerva no reseita husi Fundu Petrolíferu ne'ebé estadu sei hetan iha futuru.

Figura sira husi jestaun Fundu no polítika fiskál ohin loron ne'e sei fó konsekuénsia sira iha futuru. Bainhira Timor-Leste labele uza nia rekursu fundu mina-rai ne'ebé aloka liu husi Orsamentu Jerál Estadu ho kuidadu atu dezenvolve no promove diversifikasaun ekonomia iha setór naun petrolíferu. Despeza estadu sei depende maka'as ba iha Fundu Petróleu, kreximentu despeza ida ne'ebé la ekivalente ho retornu investimentu no sei halo osan sira ne'e hotu lalais. Sá tan ba situasaun agora ne'ebé mundu hotu hasoru hela efeito husi surtu Covid-19, ne'ebé afeta mós ba atividade ekonómiku mundiál nian inklui investimentu sira iha merkadu global ne'ebé direta hatudu valór rendimentu iha investimentu sira husi folin mina, ekidade no títulu (bonds) ne'ebé iha situasaun tuun-sa'e (flutuaun).

Maske hanesan fó sai ona husi ANPM katak sira aprova ona proposta husi Santos nudár operadór foun iha Bayu Undan, atu halo perfurasaun ba posu foun tolu hodi hasai restu

rezerva mina, maibé rendimentu husi posu tolu ne'e sei la bele f6 reseita ne'ebé sei la liu tinan ida ba estadu. Aleinde ne'e governu nafatin iha espetasaun boot atu bele hetan osan tan husi perfurasaun onshore no offshore iha kampu Buffalo no kampu sira seluk, maibé tenke rekoñese katak sira nia reseita sei ki'ik liu kompara ho reseita ne'ebé iha pasadu ita hetan husi kampu Bayu-Undan. Ba situasaun sira ne'e, Governu Timor-Leste tenke kuidadu didi'ak iha sira nia despeza, atu la bele f6 prioridade ba gastu iha set6r hirak ne'ebé sei uza osan boot no seidak f6 benef6siu ba povu no nasaun ida ne'e nia futuru no apoiu Timor-Leste atu hetan reseita ne'ebé sustentável.

Kuaze atu tama ba d6kada rua ona hafoin independ6nsia, Governu hasai ona osan biliar \$12 husi Fundu Petrol6feru hodi tuir sira nia ambisaun pol6tika ne'ebé la tuir matadalan sustentável, maibé realidade hatudu katak ekonomia povu Timor-Leste nian seidak dezenvolve ho di'ak atu bele garante sira nia moris di'ak ba tempu naruk, nudár mehi no kompromisu boot ne'ebé temi iha PEDN. Maibé to'o oras ne'e, meta hirak ne'e Governu seidak atinje ho di'ak no sira m6s kontinua la hatudu kometimentu no seriedade atu investe no promove set6r produtivu sira nudár dalan ba diversifikasaun ekonomia hodi hametin ekonomia povu ki'ik sira nian ne'ebé sustentável bainhira Timor-Leste la iha ona Fundu Petrol6feru.

Dalan Prinsipál ba Governu Timor-Leste

Entretantu, situasaun hirak ne'ebé deskreve antes la hatudu katak Timor-Leste susar atu iha mudansa, maibé ho desizaun no pol6tika ida di'ak no matenek liu bele evita ameasa sira iha futuru.

Daudaun ne'e, Timor-Leste iha hela biliar \$18.4 iha Fundu Petrol6feru, Governu tenke buka dalan ona liu husi hasa'e nia fonte finansiametu seluk husi ekonomia iha rai laran, ekonomia povu ki'ik ka ekonomia dom6stika sira. La'6s ona segredu katak levantamentu ne'ebé durante ne'e Governu halo barak liu atu finansia atividade estadu nian, liu-liu projetu boot sira ne'ebé iha hela inserteza.

Atu evita Governu hodi kontinua fakar osan saugati, Governu iha obrigasaun hodi halo avaliasaun ba projetu hirak ne'ebé la'o ona no presiza halo estudu independente no análize ne'ebé realist6ku kona ba kustu no benef6siu husi projetu ne'ebé planu ona atu implementa iha futuru. Governu tenke evita m6s programa sira ne'ebé f6 ameasa ba Fundu nia sustentabilidade.

La'o Hamutuk sujere nafatin atu Governu investe ba povu, liu husi edukasaun no saúde nudár pilár importante atu asegura rekursu umanu ida ne'ebé matenek, inovativu, no saudável. Nasaun barak ne'ebé laiha rekursu estrativa bele iha ekonomia ida ne'ebé di'ak liu tanba sira f6 prioridade ba sira nia dezenvolvimentu umanu. Ho riku soin ne'ebé úniku no limitadu husi Fundu Petrol6feru ida ne'e, Timor-Leste tenke hili ona opsan ne'ebé bele garante povu nia moris ba tempu naruk.

Projeto Tasi Mane – Sei benefisia Povu Timor-Leste ka lae?

Presiza Analiza Independente ba Kustu, Risku no Benefisio sira ba Povu Timor-Leste

Aleinde levantamentu aas ba funksionamentu estadu, Governu mós nafatin sei promove projetu hirak ne'ebé too ohin loron hatudu katak seidak iha analiza sériu no realistiku kona ba risku sira, benefisio no kustu hirak mak ita sei gasta tan.

Bazeia ba livru 3A OJE 2021 nian, planu ba tinan 2022-2023, Governu sei aloka osan ba dezlokasaun komunidadade sira hodi bele realiza Projeto Tasi Mane ho nia komponente atu kompleta faze segundu nian ba Auto-Estrada, Refinaria, Baze Fornesimentu Suai (SSB), no Planta LNG. Realidade, seidak iha serteza husi Projeto Tasi Mane ne'e rasik, ho ida ne'e ami sujere atu Governu labele kontinua halo desizaun hodi hasai komunidadade sira husi sira nia hela fatin, no obriga komunidadade atu sakrifika sira nia rai produtivu sira no estragu seluk ba sira nia moris sosiál, kulturál no ekonomia iha sira nia moris fatin.

Ami apresia ba narativu ne'ebé fó sai husi Ministru MPM katak sei halo avaliasaun lai ba projetu hirak ne'e, maibé ami nafatin dúvida tanba seidak iha avaliasaun Governu kontinua aloka orsamentu nafatin boot ba instituisaun relevante sira hanesan TimorGAP ho montante tokon \$71 iha tinan 2021, maibé ida ne'e hatudu katak Governu iha planu atu kontinua nafatin promove projetu boot sira.

Osan gastu ona, iha orsamentu no sei presiza atu hari'i Projeto Tasi Mane (tokon dolar EUA)								
Komponente	Fatin	Estatus	Gastu to'o 2019	Alokasaun 2020	Alokasaun 2021	Alokasaun 2022-2025	Kustu total kapitál estimadu	Persentajen iha OJE
Aeroporto	Suai	Harii tiha ona	75	3	3	9	100	91%
Baze Fornesimentu	Suai	Hein aprovizionamentu	51	1	5	745	900	89%
Auto-estrada	Suai-Fatukai	Harii tiha ona	305	1	3	4	340	92%
Auto-estrada	Fatukai-Beaçu	Seidak hahú	3	0	1	22	1,320	2%
Aeroporto	Viqueque	Seidak hahú	-	-	-	-	75	0%
Refinaria no pipa mina	Betano	Seidak dezeñu	5	-	-	6	1,500	1%
Pipa gas, planta LNG no portu	Sunrise-Beaçu	Seidak dezeñu	18	-	-	21	6,000	1%
Hola partisipasaun 57% iha Konsorsiu Greater Sunrise	Tasi laran	Empresta husi Fundu Petrolifeiru direktamente	650	-	-	-	650	100%
Funan ba emprestimu atu hola partisipasaun iha GS	Tasi laran	Aumenta iha Fundu Petrolifeiru	21	30	32	141	512	44%
57% husi investimentu kapitál iha Sunrise upstream	Tasi laran		-	-	-	-	6,840	0%
Kustu administrasaun no sst.	Dili		46	14	68	-	500	26%
TOTAL			1,174	49	112	948	18,737	12%

Tabela husi La'o Hamutuk bazeia ba Livru Orsamentál, Conta Jeral Estadu, proposta husi TimorGAP, Portal Transparénsia, no ami nia estimasaun. Outubru 2020

Timor-Leste gasta ona tokon \$520 ba projetu Tasi Mane, no empresta tokon \$700 tan, Governu presiza iha hanoin kriticu katak la'ós husi indústria petrolíferu mak bele hakbiit ekonomia rai laran, liu-liu investe iha kualidade moris povu sira nian. Aleinde ne'e, investe mós iha setór produtivu sira hanesan agrikultura, indústria transformadóra, turizmu, manufatura inklui kooperativa atu eleva ekonomia povu ki'ik sira nian no asegura sustentabilidade finansa estadu iha tempu agora no ba futuro.

Fundu Petrolíferu La'ós atu Garante Tusan sira

Proposta Lei OJE 2021 fó mós informasaun kona ba bareira empréstimu foun ho valór tokon \$420, ne'e signífika katak Governu bele asina kontratu empréstimu foun ho montante tokon \$400 durante tinan 2021, no emite título dívida pública ho valór tokon \$20. Molok fó lisensa ba Governu atu asina kontratu boot, no fó tusan ba jersaun tuir mai, Deputadu/a sira no públiku presiza hetan informasaun kompletu kona ba objetivu no impaktu husi empréstimu.

Relasiona ho objetivu husi empréstimu ne'e, maske iha Figura 18 (Livru 1) hatudu ona kona ba setór sira ne'ebé atu gasta liu husi osan empréstimu ne'e, infelizmente laiha informasaun kona ba projetu spesífiku ka detallu husi regra empréstimu inklui kustu totál ne'ebé Timor-Leste presiza selu fali ba futuro.

Aleinde ne'e, Figura 22 kona ba pagamentu dívida hatudu montante ne'ebé Governu sei selu fali to'o 2022. Maibé, se Governu asina kontratu empréstimu konvensional, iha tinan 2022, ita sei iha periodu de grasa hela - periodu ne'ebé la presiza selu maibé funan kontinua la'o bainhira hahú asina ona kontratu. Estimasaun husi Governu la hatudu kustu hira mak presiza selu fali ba tempu naruk, no la iha mós informasaun kona ba impaktu ba sustentabilidade finansa. Distintu Deputadu/a sira presiza tebes atu hatene estimasaun ba longu-prazu no hatene didi'ak impaktu husi empréstimu foun sira, no foti desizaun ho kuidadu.

Hanesan Governu rekoñese iha Livru 1 (Figura 2), Fundu Petrolíferu bele hotu iha 2030. Timor-Leste seidauk identifika no dezenvolve setór ekonómiku sustentável ne'ebé bele substitui estrasaun mina no gas husi Bayu-Undan ne'ebé sei remata iha tinan 2022 ka 2023.¹ Ne'e katak Governu seidauk analiza (ka seidauk pública) informasaun kona ba kapasidade Timor-Leste atu selu fali ita nia deve, bainhira ita nia Fundu Petrolíferu mamuk ona. Timor-Leste nia kapasidade atu financia servisu báziku hanesan saúde no edukasaun, sei perigozu tebes iha tinan 2030 bainhira Fundu Petrolíferu kuaze mamuk ona; Governu rasik rekoñese iha sira nia analiza hatudu katak "despeza sei tuun maka'as to'o 92% iha tinan 2028-2030...ba tokon \$386 deit" (Livru 1, p11). Ho limitasaun rekursu ekonómiku ne'e, oinsá ho ita nia kapasidade atu selu fali deve ka empréstimu hirak ne'e?

Ami sujere atu Parlamentu Nasionál labele asina no aprova sira nia proposta ba bareira empréstimu foun bainhira seidauk iha informasaun kle'an liu atu evita risku boot ba jersaun aban bain rua.

Modelu Orsamentu Foun Sei Hamenus Transparénsia

La'o Hamutuk konkorda ho objetivu husi UPMA nia Modelu Orsamentu ba kada Programa, atu hadi'ak responsabilidade, efisiénsia, efikásia no transparénsia liu husi aproximasaun ba planu no orsamentu anuál. Aprezentasaun UPMA iha eventu

¹ Livru OJE 2021, Livru Panorama Orsamentál, verzaun Tetum, Pájina 38, Tabela 19, bele asesu iha: <https://www.laohamutuk.org/econ/OGE21/books/OJE21BB1-Oct2020te.pdf>

Panorama OJE iha Novembru 2020 deklara katak vantajen husi modelu ida ne'e mak hanesan "hasa'e transparénsia no permite públiku halo *Check and Balance*". Sira hatudu mós katak modelu ida ne'e bele fasilita diálogu iha Parlamentu, "...laos deit ko'alia kona ba persentajen hira mak ezekuta ona, maibé bele hatene mós Rezultadu saida mak hetan ona husi persentajen ezekusaun orsamentu". Maske nune'e, realidade katak informasaun ne'ebé publika liu husi modelu foun ne'e hafraku transparénsia no akuntabilidade.

Sistema foun ida ne'e propoin atu fornese dadus kona ba alokasaun orsamentál no atinjimentu bazeia ba programa ida-idak. UPMA hatudu ezemplu ida husi Ministériu Saúde iha sira nia apresentasaun atu hatudu oinsá mak modelu ida ne'e bele fornese informasaun kompletu. Realidade, modelu ida ne'e nafatin hatudu katak Ministériu barak mak sei falta atu hatudu klaru ba sira nia atividade ida-idak kona ba sira nia polítika jestaun finansa no atinjimentu. La'ó Hamutuk observa katak modelu ida ne'e la konsege fasilita diálogu no fiskalizasaun iha Parlamentu, no sei halo públiku susar liu atu asesu ba informasaun.

Ezemplu ida seluk mak husi Ministériu Obras Públiku, Modelu Orsamentu ba Kada Programa konsidera "Jestaun Finansa" nudár programa ida, no alokasaun ba programa ida ne'e to'o tokon \$207. Ita haree iha Livru 4A katak montante ne'e inklui mós tokon \$194 ba transferénsia públiku. La iha informasaun kona ba montante hira mak aloka ba bee moos, ba eletrisidade, ba saneamentu, no programa sira seluk. Ami nia preokupasaun mak kategoria ba "Jestaun Finansa" ne'e la klaru; tanba formatu foun ida ne'e, ita labele hetan informasaun detallu maske iha atividade oin-oin.

Ami sujere katak di'ak liu atu iha Modelu Orsamentu ba Programa ida-idak, atu inklui programa ne'ebé espesífiku duke hakerek ho definisaun ho konseitu jerál liu ne'ebé bele hamenus akuntabilidade no transparénsia.

Instituisaun Autónoma La Presiza Hetan Transferénsia Espesial

Tuir mai, ami la konkorda ho objetivu Governu nian harii instituisaun autónoma hodi hamenus servisu ne'ebé tinan barak Ministériu sira hala'ó. Liu husi OJE 2020, Governu harii instituisaun autónoma ualu, no iha Proposta OJE 2021, Governu propoin atu harii instituisaun autónoma lima tan, kompostu husi Ajénsia ba Promosaun Investimentu no Esportasaun, Autoridade Nasional ba Agua no Saneamentu (BETL), Autoridade Nasional ba Eletrisidade (EDTL), Servisu Nasional ba Ambulánsia no Emerjénsia Médiku, no Inspetór Jerál ba Traballu.

Muda atividade no programa hirak ne'e husi Ministériu ka Sekretária Estadu atu sai instituisaun ketak ka autónoma signifika katak Ministériu sei la kontinua atu jere atividade anterior no atuál. Instituisaun foun hirak ne'e sei simu transferénsia ho maneira ne'ebé la fó detallu hanesan ho Instituisaun Governu sira seluk. Instituisaun Autónoma sira dala barak laiha obrigasaun hodi promove akuntabilidade, transparénsia iha prosesu finansa estadu, Lei OJE la fó regra espesífiku kona ba sira bele gasta osan povu nian ba saida.

Aleinde ne'e, kriasaun ba instituisaun autónoma sira, sei hamenus mós kompeténsia no mandatu demokrátiku husi Parlamentu Nasionál atu halo fiskalizasaun ba ezekusaun husi osan povu sira nian ne'ebé aloka ba instituisaun autónoma. Ezemplu ida mak ita

bele hare ezekusaun iha OJE 2018 ho montante tokon \$50 ba TL Cement hatudu ezekusaun ho 100%, maibé projetu ne'e seidak la'o no osan rai hela iha konta bankária ANPM nian.

La'o Hamutuk mós observa katak ho proposta OJE 2021, Governu propoin atu hasa'e fundu ne'ebé aloka kuaze 37% husi OJE tomak ba iha transferénsia públiku, boot liu kompara ho 25% iha tinan 2018 no 2019. Mezmu, Governu hatudu ona kometimentu ba transparénsia no sistema fiskalizaun ne'ebé nakloke, liu husi estabesimentu ba Portal Transparénsia, Portal Munisípiu no mekanizmu sira seluk, maibé progresu hirak ne'e sei la atinje se bainhira Governu kontinua hamenus transparénsia no akuntabilidade orsamentál no la tau iha pratika kona ba polítika governasaun di'ak.

Iha parte seluk, ho formatu informasaun ba alokasaun hirak ne'e limita instituisaun estadu nia knaar hanesan Governu, Tribunal, Parlamentu labele kontrola, monitoriza iha futuru, ezemplu: Portal Transparénsia no relatóriu trimestral no anuál (CGE) kona ba ezekusaun sei hatudu liña ida de'it. Ne'e hanesan cheque branca (xeke mamuk) ba governante sira, ne'ebé loke dalan ba korrupsaun no taka dalan ba transparénsia.


Ami husu ba Governu atu hapara tendénsia ba halo transferénsia públiku ne'ebé la iha transparénsia, no hametin sira nia kometimentu ba prosesu orsamentu estadu ne'ebé asesível liu ba fiskalizaun no partisipasaun popular.

Investe ba Ema Hodi Hametin Dezenvolvimentu Timor-Leste

Tinan barak ona, Governu hato' o ninia kompromisu katak sei tau atensaun aas liu ba setór edukasaun, saúde, no forneseimentu bee moos no saneamentu. Infelizmente, alokasaun orsamentu ba setór hirak ne'e la refleta iha polítika OJE nian kada tinan.

Setor sira iha OJE ba tinan 2021

OJE tomak = token \$1,895



Gráfiku ne'e husi La'o Hamutuk bazeia ba Livru sira husi proposta OJE 2021, Ministériu Finansas RDTL. Outubru 2020.

Proposta OJE 2021, ami rekoñese katak Governu aumenta percentajen ki'ik iha setór xave sira, maibé nafatin la to' o atu bele responde ba situasaun real ne'ebé povu ki'ik sira hasoru. Alokasaun hirak ne'e ho razaun atu atinje objetivu husi Planu Rekuperasaun Ekonomia de'it. Ezemplu balu hanesan alokasaun orsamentu ba setór edukasaun aumenta ho 69% kompara ho 2020, no 29% kompara ho 2019.

Haree ba alokasaun iha setór edukasaun nudár percentajen husi OJE tomak, alokasaun ba edukasaun iha proposta OJE 2021 mak 9.8%, kompara ho 7.3% iha 2020 no 9.7% iha 2019. Mudansa númeru hirak ne'e, ami nota katak nafatin la tuir pratika di'ak tuir padraun internasionál ne'ebé normalmente Governu tenke investe 30% husi orsamentu tomak ba edukasaun no saúde.

Bazeia ba Livru 2, alokasaun ho montante token \$5.1 husi setór edukasaun barak liu ba sistema Escola Café ne'ebé realidade la fó oportunidade ba labarik sira hotu atu hetan no asesu qualidade edukasaun ne'ebé di'ak no hanesan. Tanba ne'e, presiza halo avaliasaun molok haluan eskola refere, hodi evita possibilidade gasta osan barak maibé laho rezultadu optimal tantu ba manorin na'in sira no mós ba labarik sira.

Ami nota mós mudansa balu iha alokasaun ba setór importante sira seluk hanesan setór saúde ne'ebé aumenta ba tokon \$106 ka aumenta 44% kompara ho médiu sira iha 2020, no 34% kompara ho 2019. Haree ba alokasaun ba saúde nudár persentajen husi OJE tomak, alokasaun ba saúde iha proposta OJE 2021 mak 5.6%, kompara ho 4.5% iha 2020 no 5.1% iha 2019. Ami nafatin enkoraja Governu hodi halo investimentu ida ne'ebé di'ak liu hodi fornese facilidade saúde ne'ebé adekuadu no asesível ba ema hotu.

Rezultadu husi Modelu Orsamentál foun, susar tebes atu hatene alokasaun ba bee moos no saneamentu, hanesan ita diskute iha leten. Bazeia ba informasaun ne'ebé iha, setór bee moos no saneamentu hetan de'it 0.7% husi total OJE 2021. Ita presiza hatene alokasaun ba setór importante ne'e hira, hodi bele hatene Governu nia prioridade. Tanba ne'e, ami sujere mós atu Governu tau nafatin atensaun aas ba direitu báziku povu sira nian nudár responsabilidade estado nian.

Espera katak povu ne'ebé merese liu atu hetan tulun husi estado labele adia tan ba tempu inserteza iha futuro, maibé tempu ona atu investe duni ba direisaun loloos hanesan ami mensiona iha leten atu akomoda direitu no interese sidadaun sira ne'ebé vulnerável no merese liu atu hetan apoiu.

Konkluzau no Rekomendasaun

Ami rekoñese katak iha proposta OJE 2021 mak fó prioridade ba dezvoltimentu ekonómiku, maibé la signifika ita tenke sakrifika sustentabilidade finansia no Governasaun di'ak hodi atinje de'it mehi ne'ebé iha hela inserteza no fantasia. Bazeia ba ami nia observasaun iha levantamento husi Fundu Petrolíferu ba OJE kada tinan ne'ebé Governu halo barak liu aloka de'it ba atividade no funsionamentu makina estado. Aleinde ne'e Governu nafatin promove projetu boot sira hanesan projetu Tasi Mane no projetu Petrolíferu sira seluk ne'ebé too ohin loron seidauk hatudu serteza husi projetu hirak ne'e ninia benefísiu ba povu, inklui kustu hira mak Timor-Leste sei hasai tan no risku saida mak ita sei hasoru iha futuro.

Nune'e, ami enkoraja Governu atu hare alternativu seluk ba iha fonte finansiamentu liu husi investe ba iha ekonomia produtivu sira ne'ebé liga ba kondisaun real povu sira nian hodi bele garante sustentabilidade moris povu sira nian no mós hasai ona Timor-Leste ba dependénsia husi riku soin mina no gas ne'ebé limitadu no sei remata mós iha tempu besik.

Ami haree katak modelu Orsamentu Foun ne'ebé UPMA fó sai ba iha programa ida-idak dala barak jerál liu, maske inklui atividade oin-oin, maibé iha formatu foun ida ne'e sei kria obstákulu ba públiku, liu-liu entidade relevante hanesan Parlamentu, no sociedade sivíl sira atu hetan informasaun detallu. Tanba ne'e, ami sujere atu ho modelu no formatu foun ne'e presiza fó sai informasaun espesífiku ba iha kada programa hodi nune'e bele fasilita desizaun matenek no diálogo di'ak iha prosesu fiskalizaun husi Parlamentu inklui públiku hotu bele hatene informasaun ida loloos kona ba osan sira gasta ba saida no ninia rezultadu oinsá?

Ami nafatin preokupa ba objetivu Governu sira nian hodi harii instituisaun autónoma, karik ida ne'e la'ós solusaun úniku hodi halo atinjementu ba frakeza hirak ne'ebé durante ne'e Ministériu relevante sira hasoru, tanba ida ne'e sei hamenus mandatu husi Governu, Parlamentu, no Tribunal no Públiku iha prosesu fiskalizaun, monitorizaun

no kontrolu ba osan povu sira nian ne'ebé hasai ona ba instituisaun refere. Nune'e, di'ak liu atu hadi'ak no solusiona lai difikuldade internal sira ne'ebé Ministériu ida-idak hasoru duke hamosu tan instituisaun hodi hamenus transparénsia no la tau iha pratika ba sistema governasaun di'ak.

Iha proposta OJE 2021, Governu propoin tan bareira empréstimu ho tokon \$420. Ami sujere ba distintu Deputadu/a sira atu uza kompeténsia ho didi'ak molok foti desizaun no aprova bareira empréstimu antes hatene kona ba kustu atu selu fali ba tempu naruk hafoin periodu grasa atu la sakrifiika jerasaun sira iha agora no futuro.

Ami apresia ba hanoin sira ne'ebé adopta ona iha PRE, maibé ami mós iha sujestaun balu ne'ebé presiza halo ajustamentu ba kondisaun real no urjénsia ne'ebé povu sira rasik presiza laho narativu konseitu fantasia ne'ebé tinan barak ona Governu Timor-Leste kontinua promove. Nune'e, husu Governu atu tau matan ba setór importante sira ho narativu ida loloos no realistíku ba setór edukasaun, saúde, bee moos no saneamentu inklui mós setór sira seluk ne'ebé bele hakbiit ekonomia rai laran hanesan setór agrikultura, turizmu, indústriia transformadóra no manufatura.

Ami husi La'ó Hamutuk sempre prontu atu oferese ami nia kontribuisaun analítiku hodi ajuda distintu Deputadu/a sira hodi halo diskusaun kle'an liu tan ba proposta Lei OJE 2021 iha debate plenária molok halo aprovasaun iha Parlamentu Nasionál.

Obrigadu wa'in ba Ita-boot sira hotu nia atensaun no konsiderasaun tomak.

Ami be saran lia,




Celestino Gusmão



Elizaria Febe Gomes



Bree Ahrens



Charles Scheiner



Marta da Silva



Adilsonio da Costa Jr.